



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

f Tir Yimiyim

ig tiryimiyim@aolima

yt tir yimiyim

TAPAK 10

Sudan nung tashi lemdanger yimsü asütsü jembir

Tottenham manager asütsü Antonio Conte shimogo

VOL. XIX ONO. 27 (ADOK 27) DIMAPUR YANGTEPNÜ (THURSDAY) YIMPOKSÜI (NOVEMBER) 04, 2021

₹ 5.00

Dimapur DC-i fireworks/fire-crackers amshiyim metetdaksür

Dimapur, November 3, 2021 (TYO): Iba tetuyuba nung ajemdaker Dimapur Deputy Commissioner Rajesh Soundararajan, IAS-ia sangdong ka agütsüogo.

Mozü ki, nursing home, primary & district health cares centre, shisaliok rejutem, courts aser tamangba yimsü dak sendakba tesemtem dang 'silence zones' ajar aser item tesem nung fireworks mapoktsü, ta Dimapur DC-i ashi.

Temelaba aliba shishilembartem ajanga reduced emission (improved crackers) aser green crackers ayoktsü melar, ta paisa ashi.

Ola tulu adokba fire-crackers yangluba, ayokba aser amshiba noktanger. Iba nung joined

firecrackers (series crackers or laries) dena lir. Maneni, barium salts aliba fireworks amshitsü memelar, ta Dimapur DC-isa metetdaksüogo.

Diwali, Gurupurab amala benjung anogo nung fireworks amshir aser ibaji aonung 10:00 ako tashi dang amshitsü melar. Christmas eve aser New year eve nunga 12:00 A.M meta fireworks amshir anungji item benjung nunga aonung 11:55 ako nungi anepdang 12:30 ako tashi dang amshitsü melar, ta paisa ashi.

Supreme Court-i firecrackers amshiba atema 'total ban' magütsür ajisüaka public-i firecrackers mamshitsü aser amshi nunga tera dang amshitsü metetdaksür, ta Rajesh Soundararajan-isa metetdaksü.

Manipur nung NPF züngsem 12 BJP nung aden

Guwahati, November 3, 2021 (Agencies): Manipur nung Naga People's Front (NPF) züngsem tongti 12-i BJP nung denogo.

Mongulbarnü Manipur Chief Minister N Biren Singh-i Imphal nung parnok pelaa agizük.

BJP-i aniba Manipur sorkar nung NPF-i yariteper. Manipur nung NPF MLA 4 lir.

"Parnoki BJP nung adenba ajanga BJP aser NPF tsüingda tesentaktep nung mekongshitsü" ta Chief Minister Biren Singh-i ashi.

"BJP aser NPF tesentaktep junga dang lir aser telok ana tsüingda mangatettep kecha malitsü. Nisungtemi pei dennüba party nung adenba ajanga ken o madoktsüla. Taruba kümsük nunga BJP aser NPF külemi yariteptsü" ta paisa ashi.

"Prime Minister Narendra Modi lenistüba nung amangba aser state o linük nung temelenshi bener aruba ajanga parnoki (NPF züngsemtem) BJP nung adener"

ta Biren Singh-isa ashi.

"Tanga political party tem nung züngsemtemia BJP nung adentsü jangraba shiogo. Ajisüaka, central lenirtem nungi temelaba meshiba sülen November ita tashi nung parnok aniochtsü atema telemetba ka agitsü" ta paisa metetdaksü.

BJP-i hill districts nung menden 15 aser valley areas nung menden 30 tema nung takok angutsü, ta Manipur CM-i shisem.

Yashi BJP nung adenertemji Chandel unit nung NPF executive members 12 lir.

Parnokji ex-MLA candidate TS Warnam, TS Molarshing, SK Shemy, D Anthony, Th Anghung, Asem Kom, Sn Semler, Hopeson Saka, KC Ahanjoy, Hb Lawrence, SK Lovingson aser Thungamden nung lir.

Sangküm April ita nung Manipur Assembly election agitsü sentong lir.

Tripura nung Muslim nunger anema inyak; State sorkari teinyaktsü meinyak

Agartala, November 3, 2021 (Agencies): Supreme Court (SC) advocates aser human rights activists telok kati Tripura semdanga tensa osang metetpela aser parnoki ashiba agi Muslim nunger dak tenük yoka mapa inyak.

Tawa tu SC advocates aser human rights activists - Ehtesham Hashmi, Amit Srivastav, Ansar Indori aser Mukesh nungeri Tripura semdang aser Mongulbarnü parnoki bushitetba osang metetdaksü.

BJP-i aniba Tripura sorkari teinyaktsü shitak meinyak aser ozüing alema inyakba maziüoktet, ta parnoki ashi.

"Lendong ataloktsü anogo pezü tejakdang Muslim telok Jamaat-E-Ulema (Hind)-i Chief Minister Biplab Kumar Deb den ajurutep aser parnoki pa dang ibala mesükba inyakyim ajanga Hindu

asere Muslim nunger tsüingda tesentaktep raksatsütsü akok ta shia liasü. Parnoki yamaji shiaka sorkari mapa kecha meinyak aser ibaji parnokia ozüing alema mapa inyakba nung yaritepba ama lir" ta parnokisa metetdaksü.

Tripura nung Bajrang Dal, Vishwa Hindu Parishad aser Hindu Jagran Manch teloktemi lungkak aitba sentongtem agidang nübo agi tangar memeneperitem indang mosque 12, doka 9 aser ki asem dak tenük yoka mapa tamajung inyak ta parnokisa ashi.

"Bangladesh nung Hindu nunger amakba atema Tripura kübok tesem 51 nung lungkak aitba sentongtem agi. Item sentong agiba sülen ozüing alema mapa inyak. Sorkari mapang shitak nung teinyaktsütem inyak ka asübo lendong tulu matalokla" ta SC lawyer Ehtesham Hashmi-i ashi.

Nagaland Police nung Constable tasen 489 anioker



November 3, 2021 nü NAPTC Parade Ground, Chumukedima nung recruit constable 489 adenba 66th batch pur Ceremonial Attestation Parade agiba noksa nung angur.

Dimapur, November 3, 2021 (TYO): November 3, 2021 nü Nagaland Police Training School (NPTS) Parade Ground Chumukedima nung Ceremonial Attestation Parade agiogo.

Iba sentong ya Recruit Constables 489 adenba 66th batch atema agi.

Tanü Nagaland DGP, John Longkumer-i parade sema ao aser parade contingents 16 nungi salute agia liasü.

John Longkumer-i 66th Batch nung constables aser parnok kibongtem nem tenüngsang agütsü aser Nagaland Police kibong nung pelashishia aniokba metetdaksü.

Police ya Peace Warriors lir aser loktiliba nung law and order ketdangsüa repranger. Asenoki Community Oriented Policing nung temolung agütsütsüla aser mapa inyakba nung ajemdaker ang promotions agütsütsü, ta Nagaland DGP-isa ashi.

Paisa constable tasentem

dang social media sabangtem tim mesüi mamshitsü ashi.

Principal NPTS, Aboli Metha, unit commanders, parade commanders, trainers, IGP training, DIG Training nungertemi takok ngua 66th batch nem training agütsüba atema John Longkumer-i parnok nem tenüngsang agütsü.

Iba sentong nung Principal NPTS, Aboli Metha-i constable tasentem nem tezüngzüktep agidaksü.

Recruit Constables 489 rongnung women constables 85 dena lir aser parnok nem physical training, drills, weapon handling, investigation subjects aser awareness programmes balala agütsüogo, ta Metha-i ashi.

Training agirtem rongnung post graduates 6, graduates 78, HSSLC 66, Matriculates 133 aser under matric 206 lir, ta laisa ashi.

Covid wara mapang training agi saka teinyaktsü shitak inyakba

ajanga nisung shinga dak-a Covid meputeti dang tembangogo, ta laisa shisem.

"Nagaland CM, Dy. CM, DGP Nagaland aser PHQ nung tongti ketdangsürtemi teyari agütsüba atema pelar" ta Metha-isa ashi.

Iba sentong nung DGP Nagaland-i 66th batch nung takok angur nem sempettem agütsü.

Sentong nung Parade commander ji Vice Principal, NPTS, I Meren Chenth liasü aser Parade 2 i/c ji CDI, NPTS, ABI Pitongse Sangtam liasü.

Sempet angurtem: All Round best & Best in Legal studies : Constable Limasunep Longkumer,

Best in weapon Handling : Constable Anguvito H. Zhimomi,

Best in Drill : Constable Phasenti Magh,

Best in physical training : Constable Zuchanthung Tungoo

Best in Turn out : Constable Khriepthreto Meyase.

COVID-19 Nagaland: 11 dak putet, 19 taneptsü angu & 1 asü

Kohima, November 3, 2021 (TYO): Nagaland nung Bodbarnü nisung 11 dak COVID-19 putet, 19 taneptsü angu aser nisung ka asü.

"Tanü puteteritemji Dimapur nung 9 aser Mokochung o Phek nung kaka (1) lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Tesüiba ghonda 24 tsüingda COVID-19 puteta alir nisung 19 taneptsü angu. Parnokji Dimapur nung 13, Kohima nung 2 aser Longleng, Mokochung, Phek o Tuensang nung kaka (1) lir" ta

paisa ashi.

Nisung 31,879 rongnungi 29,951 taneptsü nguogo aser ibaji taneptsü angur 93.95% lir, ta DR Kikon-isa ashi.

Tang nisung 195 anepaludar saka parnok 161 dakbo shirangba yimya kecha mali, ta paisa ashi.

Tuensang nung COVID-19 puteta alir ka asüba züngsema tasür ajak agi 687 kümogo, ta paisa shisem.

"Mongulbar tashi nung nisung 712,621 nem COVID-19 vaccine indang dose 12,10,994 agütsüogo" ta State

Immunization Officer, Dr Ritu Thurr-ia ashi.

"Vaccine agirtemji frontline workers 60,961, healthcare workers 15,998, arishi küm 45 ser temapur 202,670 aser arishi küm 18 nungi 44 tsüingda alir 432,992 lir" ta paisa ashi.

Vaccine agirtem rongnungi nisung 498,373-i dose anaprong agiogo. Parnokji frontline workers 48,006, healthcare workers 13,383, arishi küm 45 ser temapur 162,619 aser arishi küm 18 nungi 44 tsüingda alir 274,365 lir" ta Dr Thurr-isa metetdaksü.

Petrol & Diesel jenjang dalangba akümer

New Delhi, November 3, 2021 (Agencies): Bodbarnü Centre sorkari petrol aser diesel nung excise duty agiba ajemtsü osang metetdaksüogo.

Diwali amongtsü anogo ka lia Centre-i petrol nung Rs 5 aser diesel nung Rs 10 excise duty ajemba osang sangoktsü.

Petrol aser Diesel nung excise duty ajemba ajanga Rabi

season mapang aluyimertem ajanzüktsü, ta sorkari ashi.

Centre-isa state sorkartem dang petrol aser diesel nung value added tax (VAT) ajemtsü ayongzükogo.

Kohima nung district level NECTAR awareness sentong agi



Nagaland education project- "The Light House (NECTAR)" indang district level awareness sentong ka November 3, 2021 nü DPDB Hall, Kohima nung agidang Principal Director, Department of School Education aser Project Director, NEP- The Lighthouse (NECTAR), Shanavas C. IAS ajanga o jembiba mapang tangokba noksa ka yangi angur.

Dimapur, Yimpoksüi/Nov. 03 (TYO): District sasep nung stakeholder, NGO aser department balala den Nagaland education project- "The Light House (NECTAR)" indang district level awareness sentong ka November 3, 2021 nü DPDB Hall, Kohima nung agia liasü.

Principal Director, Department of School Education aser Project Director, NEP- The Lighthouse (NECTAR), Shanavas C. IAS ajanga iba Project nükjidong aser inyakyim indang jembiba mapang, government school tem nung shisaliok angazükba jenjang tajungba kumdahtsüsü aser State nung education jenjang tajungba kumdahtsüsü nükjidong nung Department of School Education ajanga Nagaland Education Project (NEP)- The Lighthouse (NECTAR) ya tenzük, ta ashi.

World Bank nungi teyari agia Department ajanga Nagaland Enhancing Classroom Teaching and Resources (NECTAR) project ya tenzük, koba India

indang North-East region nung World Bank ajanga senotsü teyari agütsüba Education Project indang indang state sorkari mapa kuma inyakba mezüngbuba alitsü, ta pai ashi.

Iba project yagi state indang education system nung takum tasen ka agütsüsü, kaketshir aser tesayurtem pei sempet angatetsü atema maongka tuluba agütsüsü, kechiaser Nagaland nung aliba education system nung timtem balala ajurur aser National Achievement Survey (NAS) ajanga asadangba ama kaketshirtem angazükba ajema akumer, ta Shanavas-i ashi.

Iba sentong ya ajanga state tesem ajunga nung aliba school tem ketdangsuba tajungba akumtsü, tesayuba yimyatem tajungba kuma renloksü aser angazükba yimyatem ajunga renlokdaktsüsü atema sorkari temolung agütsür.

Iba project yagi Nagaland nung aliba government school tem nung azünger tanur 1,50,000 shi aser school Heads densema tesayur 20,000, District aser

Sub-District Officer 100 aser SMC aser SMDCs 2000 shi ajangzüksü, ta paisa ashi.

Iba sentong nung Deputy Commissioner, Kohima, Gregory Thejawelie-i jembiba mapang Department of School Education dang tang ajangshia aliba tensa atema inyaktsü aser shilem shidak agia state nung education system renlokdaktsüsü, tesayur temi tajungtiba nung sayutsü asoshi rangloker inyaktsü ajungshia liasü.

Tarutsü putu atema tanurtem asoshi ajaki shilem agia amalitep alitsü paisa ajungshia liasü.

Iba sentong nung Project Assist. DMA SS Kohima Ruokuoneino menden liasü, Deputy Secretary aser Deputy Project Director, Avelu Ruho-i 'community investment and collective management' indang PowerPoint presentation agütsü

Maneni Sr. SDEO Kohima, Theyievilie Suohumvii-i anir jembishinüba mapang agi aser DEO Kohima, Neizetuonuo ajanga melepzüng o jembiba liasü.

Governor's Certificate of Excellence sempet agütsüogo



Nov. 3, 2021 nü DC Kohima, Gregory Thejawelie-i essay zülutepba nung takok angur nem Governor's Certificate of Excellence, 2021 sempet agütsüdag tangokba noksa nung angur.

Dimapur, Yimpoksüi/Nov. 03 (TYO): Gandhi Jayanti 2021 nüngtem nung "Relevance of Gandhiji's thoughts for building a peaceful and prosperous Nagaland" onük nung ajemdaker essay zülutepba nung takok angur nem Governor's Certificate of Excellence, 2021 sempet agütsüba sentong ka Kohima District Planning and Development Board (DPDB)

Hall, Kohima nung November 3, 2021 nü agia liasü.

Iba sentong nung Additional Deputy Commissioner Kohima, N. Bhavani Sri, IAS menden liasü aser pai iba essay tetoktepba indang tongmelang agi rateta ashi.

'Azadi Ka Amrit Mahotsav' nung shilem ka ama Gandhi Jayanti 2021 anogomung nung aser Raj Bhavan-i sentong yanglua Nagaland nung aliba

district ajak dang High School aser Higher Secondary School nung azünger kaketshir atema essay zülutepba sentong ayongzüksü shia liasü, ta lai ashi.

Yamaji Kohima District level essay competition ya metetdakja aliba omen nung ajemdaker online ajanga agia liasü, kong school 18 nungi shilem agir 57 rongnung Rüzühkrie Higher Secondary School, Kohima nungi Class 12 nung azünger Vijayanand V. Thomas-i mezüngbuba jenjang nguteta senpet sen 25,000 den kulizüng agütsü aser Stella Higher Secondary School nungi Class 12 nung azünger Alinen Kent-i tanabuba jenjang nguteta senpet sen 15,000 den kulizüng agütsü liasü.

Mezüngbuba jenjang nguteter nem senpet ya Deputy Commissioner Kohima, Gregory Thejawelie NCS ajanga amoktsü aser tanabuba jenjang nguteter nem senpet ya Principal Director, Department of School Education, Shanavas, C. IAS ajanga amokja liasü.

YSS ESSAY COMPETITION

Topic: KRISTANI LONGKAK AITBA NUNG SHILEM AGITSÜ ASÜ MASÜ? Shirnoki shilem agitsü? – (a) Student (Doctoral student memelar) (b) Mapa inyaker küm 30 tekübok melar

Ojang kwi – 1500 - 1800
Submission – 20th November

Book Prize:

First – YSS Vol. 1 to 5 plus 5 NECU books (10 books)
Second – YSS Vol. 1 to 3, plus 4 NECU books (7 books)
Third – YSS Vol. 1 to 2, plus 2 NECU books (4 books)
Consolation – One each copy of YSS Vol. 4 or 5

Temetetsü:

a) Ao o nung züluba dang agizüksü (Spelling Arok Osep 2019 agitsü)
b) Eassyji YSS meyong akumtsü aser YSS Vol. 6 nung adoktsü. Editortemi edit asütsü temelaba agütsüsü.
c) **Tetendanger:** Mr. Tiatoshi Longkümer, KABA (9856587377), Rev. Temsüwati Kichu, MTBA (7005761441), Rev. Mapula Lemtur, Tuli (9612313753)
d) Essay ajak wlongchar@gmail.com dangi yoktsü. Lanuri shilem agitsü ayongzükur.

~ YSS TAYONGER

Governor & NPC-i Diwali benjong salem lemsatep

Dimapur, Yimpoksüi/Nov. 03 (TYO): Nagaland nung aliba nüburtem dang Diwali benjong salem abener. Tammang madak tesangwa agi takok anguba, temenen madak tajung agi takok anguba, tiazü madak ochi aser mashi-malu madak shisatsü agi takok anguba temaitsü iba benjong ya amunger, ta Assam aser Nagaland Governor, Prof. Jagdish Mukhi-i sangdong ka ajanga ashi.

Kidang aser office nung sentsü tabu balala ki-naro inoka iba benjong ya amunger. Iba benjong yagi nüburtem nem kinungertem aser mapa inyakdak kulemi mapang indoktsü aser tesendaktep tajung yanglutsü maongka agütsür.

Iba anogomung nung benjong tanüla agi nenok tammang nung tesangwa agi len aniangma. Nenok nem anema aliba, tepela

aser yimchiyimjung moajangma, ta Governor-isa ashi.

Maneni sangdong ka nung, NPCC nungi ketdangsüri anir züngsemtem ajungai Hindu nunger dangi Deepawali benjong salem abener, ta NPCC tir, K. Therie-i ashi.

Tammang aser temenen tanüla samadakja iba tesangwa benjongmung amungba ama asen takum nung temenen aser temenen mapatem Deepawali tanüla chichiba agi samadaktsüsü bilemti arungma, ta ayongzükba liasü.

Temenen madak tajung agi takok anguba benjongba mapang lokti menentsüsa mapatem temabai ajungketba nungi asenok pila liti aser chichiba 'democracy, justice aser equality' tanüla nung iba benjong mungti, ta NPCC tirisa ayongzükba liasü.

Kohima nung Two-wheeler taxi permit atema application meshir

Dimapur, Yimpoksüi/Nov. 03 (TYO): Nagaland lisopur tejangrartem nungi Kohima Town nung two-wheeler taxi permit atema application meshir.

Iba atema application form ya Office of the Deputy Commissioner & Chairman, Regional Transport Authority, Kohima Nagaland nungi angutsü, ta Regional Transport Officer & Secretary Regional

Transport Authority, S. Yaongsanglee Chang ajanga sangdong ka nung ashi.

Application agütsüsü aser submit asütsü atema November 15, 2021 ya tatembang asütsü.

Tarutsü nung osang magütsü tashi Local Taxi, Regional Taxi aser City bus permit atema application magütsüsü aser memeshitsü, ta kasa sangdong ajangasa ashi.

Transport Dept. ajanga Good Samaritan Award agütsüsü

Dimapur, Yimpoksüi/Nov. 03 (TYO): Gari lendong tesashi ajurua alirtem nem teyari agütsü aser lendong ataloker 'Golden Hour' mapang temang anepalutsü atema Hospital/Trauma Care Centre bushia anir aortem, Tajung Samaritan (Good Samaritan) nem sempet agütsüsü scheme atema Ministry of Road Transport and Highways (MoRTH) ajanga guidelines yanglutsüogo, ta Transport Commissioner, Nagaland, Elias T Lotha-i sangdong ka nung metetdaktsü

Iba scheme ya October 15, 2021 nungi amshitsü aser 5 th Financial Cycle, i.e., 31st

March 2026 tashi alitsü, ta pai ashi. Lenmang nung gari lendong ajurur alirtem yaritsü, aser tai maketba takum kumzüksü asoshi dangartem ajungmesotsü nükjidong nung iba sempet ya agütsüsü.

Lendong atalokba nung Tajung Samaritan mapa inyaker shia nem senpet sen 5000 agütsüsü. Ano Tajung Samaritan tajungtiba 10 nem National Level Awards agütsüsü aser ibai küm ka nung sempet agizükba alirtem rongnungi shimtetsü aser par ter nem sen lakh ka-ka (Rs. 1,00,000/- each) agütsüsü, ta sangdong ajangasa ashi.

**GOVERNMENT OF NAGALAND
DIRECTORATE OF TECHNICAL EDUCATION
NAGALAND: KOHIMA**

NO : DTE/CSAB-NEUT/1/2018-19

Kohima, dated the 3rd Nov, 2021

NOTIFICATION

JEE (main) 2021 Candidates are informed to register online counseling as per the schedule given below through the given website www.csab.nic.in.

S. No	Event	Duration
1.	Online provisional Registration and uploading of documents / response by candidate to query (if required). [Engg. & Arch.]	November 6 – November 19, 2021
2.*	? Online provisional Registration, uploading of documents / response by candidate to query (if required)[Pharmacy] ? Checking of documents including domicile and category certificates by state centers and finalization of registration [Pharmacy] ? Filling Up the Choices [Pharmacy]	November 6 – November 19, 2021
3.	Checking of documents including domicile and category certificates by the DTEs of respective North Eastern States/UTs/NERIST, response by candidate to query (if required), Finalization of registration [Engg. & Arch.]	November 7 – November 20, 2021
4.	Filling Up the Choices Starts [Engg. & Arch.](Candidates will be permitted to fill choices only after successful registration and document verification)	November 07, 2021
5.	Filling up of Choices Ends [Engg. & Arch. only]	November 21, 2021
	Reconciliation of data, verification and validation of allocated seats (by NIC, CSAB, DTEs of states/UTs/NERIST)	November 22-27, 2021
6.	First Round of Seat Allotment	November 28, 2021
7.	Online reporting: Online payment of counseling and seat allotment/acceptance fee of Rs. 3,000/- and exercising options (Float/Slide/Freeze) by the candidates who have been allotted seats against first Round of allotment. (Candidates exercising the Freeze option can download Allotment Letter and Provisional Admission Letter and proceed for final admission at allotted Institute as per schedule)	November 29- December 04, 2021
	Reconciliation of data, verification and validation of allocated seats (by NIC, CSAB, DTEs of states/UTs/NERIST)	December 05, 2021- December 08, 2021
8.	Second Round of Seat Allotment	December 09, 2021
9.	Online reporting: Online payment of seat acceptance fee of Rs. 3,000/- by the candidates who have been allotted seats against 2 nd Round of allotment. (Candidates can download Allotment Letter and Provisional Admission Letter and proceed for final admission at allotted Institute as per schedule)	December 10-12, 2021
10.	Seat Withdrawal	December 13-15, 2021
11.	Spot Round (if any) to be Declared by the States/UTs/NERIST	December 16-18, 2021
12.	Reporting at the admitting Institute	December 20-24, 2021
13.	Participating Institute to report admission data to CSAB	December 27, 2021

Note: -

* Registration and Choice filling for Engineering & Architecture will be separate from that of Pharmacy.

Spot round may be conducted by respective DTE/State. Also, separate registration may be required, if conducted.

**Candidates who have received provisional admission letter after first round and second can proceed for admission, in case they are not participating for subsequent rounds of counseling. The need not to wait for the CSAB NEUT Process to end.

(ER. VIPULHOU LHOUNGU)

JOINT DIRECTOR
CENTRE-IN-CHARGE

Issued by DIPR

**GOVERNMENT OF NAGALAND
OFFICE OF THE CHIEF ENGINEER, WATER RESOURCES DEPARTMENT
NAGALAND: KOHIMA
ADVERTISEMENT**

Eligible candidates are invited for Walk-in-Interview for filling up the following vacancy under the scheme National Hydrology Project (NHP) funded by World Bank under Water Resources Department, Nagaland, Kohima on contractual basis for a period of one year and flexible for extension thereafter.

SI No	Name of the Post	No. Of Posts	Qualification	Emolument per month	Scheme
1	GIS Expert (Junior Level)	One(01)	Minimum Qualifications: Master's degree in Remote Sensing & GIS/Geo-informatics or Master's degree in relevant subject or equivalent with PG Diploma in RS&GIS from recognized institutions/university. Desirable: Good Knowledge of GIS/CAD, Web enable GIS System, MS office.	35000	National Hydrology Project

Experiences:

- * Adept in GIS based analysis on raster and vector data including development of customized Arc Tools and Python scrips for handling repetitive tasks.
- * Experience in catchment and river network delineation.
- * Familiarity with methodology for extraction of physiographic parameters for preparation of synthetic unit hydrograph, familiarity with HEC Geo Ras and HEC Geo HMS for developing catchment models.
- * Knowledge in computer, Remote Sensing and GIS tools, Mapping of Data with six months or more experience.
- * Fluency in English, both oral and written.
- * Competence in relevant report writing.

Note:

- * The GIS Expert shall be appointed for one year starting from the date of his/her appointment. The contract may be extended for another year after the successful assessment by the review committee.
- * Candidates must submit self attested photo copies of the following documents:
Admit card of HSLC for age proof, ST, Indigenous Certificate, No objection Certificate from HOD for those already in service, Educational Certificate from HSLC onwards with 3 passport Photos.
- * Application form may be collected from the office of the Chief Engineer, Water Resources Department, Nagaland, Kohima on any working day w.e.f 5th Nov, 2021.
- * No individual call letter shall be issued.
- * The last date for submission of application form is 11th Nov, 2021.
- * List of qualified candidates to appear the interview will be put up in the Office Notice Board on 12th Nov, 2021 and the date of interview will be on 15th Nov, 2021.

Sd/-

(Er. HOTOVI AYEMI)

Chief Engineer

Water Resources Department, Kohima, Nagaland.

Sikkim CM-i Lovlina Borgohain & coach Sandhya Gurung na ajuru



Gangtok, November 3, 2021

(Agencies): Sikkim Chief Minister Prem Singh Tamang-i Mintokgang nung par official residence nung Olympian Lovlina Borgohain aser la indang coach Mrs. Sandhya Gurung na jaoka sensaksem.

Bodbarñ Chief Minister Tamang-i Lovlina Borgohain nem teningsang agütsü. Tokyo Olympics 2020 nung lai Bronze medal angu.

Mrs. Sandhya Gurung-i len ania sayuba ajanga Lovlina-i takok anguba atema Tamang-isa la nem teningsang agütsü.

Sandhya Gurung-i Dronacharya award anguba atema paisa pelaba metetdaksü.

Tamang-isa state sorkar tenung nung Miss Lovlina Borgohain nem Rs 10 lakhs aser Mrs. Sandhya Gurung nem Rs 5 lakhs agütsüba osang

metetdaksü.

Paisa Sikkim nung boxing, taekwondo, badminton amala individual sports yaritsü aser saisapongertem ajungketsü nangzük.

Iba mapang Sikkim Olympic Association president Kuber Bhandari, Arjuna Awardee & former Olympian Jasral Pradhan, Political Secretary to HCM, Jacob Khaling aser Secretary to HCM, Dr. S.D Dhakal nung liasü.

Sikkim nungi Sandhya Gurung nem 'Major Dhyan Chand Khel Ratna Award' agütsütsü. Boxing wadang nung lai shilem tajung agiba atema iba sempet agütsütsü.

November 13, 2021 nikonngang 4:30 ako nung Rashtrapati Bhavan indang Darbar Hall nung sentong ka agidang India President-i sempettem lema agütsütsü.

Renu Sharma-i Mizoram chief secretary inyaker

Aizawl, November 3, 2021

(Agencies): IAS ketdangsür tejen Renu Sharma-i Mongulbar nungi Mizoram nung chief secretary inyaksü tenzükogo.

Renu Sharma ya Hombarñ Aizawl tonga aru aser additional chief secretary to the chief minister JC Ramthanga ket nungi Chief Secretary mapa agizükogo.

Ramthanga-i Hombarñ chief secretary Lalnunmawia Chuaungo ket nungi mapa agizüka liasü.

October 28 nü Centre-i Mizoram chief secretary inyaksü atema Sharma shima liasü aser la dang November 1 nungi mapa agizüka inyaksü metetdaksü.

Kasa anogo nung Mizoram sorkaria JC Ramthanga dang November 1 nungi chief secretary mapa inyaka atatsü

lemzüktsü.

Mizoram-i marudang Renu-i Government of NCT of Delhi nung Additional Chief Secretary (Transport) inyaka liasü.

Covid-19 wara mapang lai Delhi ung lockdown alema inyakba atema Ministry of Home Affairs (MHA)-i la mapa nungi anenja liasü.

1988 batch indang AGMUT cadre officer Renu-i taoba mapang Mizoram nung mapa inyakogo. June 2011 aser August 2012 tsüngda lai finance aser general administration department tem nung Commissioner aser Secretary inyakogo.

2016 küm la maneni Mizoram nung inyaksü mapa lemzüktsü aser idangji lai state home and personnel & administrative reforms department nung principal secretary inyaka liasü.



Bodbarñ Assam Chief Minister Himanta Biswa Sarma-i Assam Medical Service Association ketdangpurtem den senden ka amendang agiba noksa angur. Senden nung CM Sarma-i doctor tem time-scale promotion, cadre revision aser doctor tem tsüngda itasen kasa agütsütsü onüktem reprangtsü nangzük. Iba senden nung Assam Health Minister Keshab Mahanta aden.



TIR YIMYIM YIMOBILEM (EDITORIAL)

DIMAPUR YANGTEPNÜ, YIMPOKSÜI (NOVEMBER) 04, 2021

Totzü jenjang atema Nagaland sorkaria kechi ashir?

-P Tiamongba Aier

India nung anogoshia totzü jenjang tupet atur aser yamaisa tura hopta ishika tsungda petrol litre nung Rs 150 akümtsü akok ajisüaka, Centre aser state sorkartemi nübortem timtem yaritsü asoshi tax ajemtsü tebilemba kecha mali. Diwali amongtsü anogo ka lia Centre-i petrol aser diesel nung excise duty ajemba osangbo metetdaksüogo saka benjung tembangba sülen totzü jenjanggi anasü agi teimba ajungkettsü meteta mali. COVID wara ajanga takoksa anguba aser COVID anema inyakba nung sen endokba meyipa angutsü atema sorkartemi petroleum products indang tax nungi sen arulen dang bushir. Centre-i Goods and Services Tax (GST) kübok petroleum products dendaktsütsü atema tebilemba shidangogo saka State aikati ibaji magizüker, kechiyong iba ajanga state tem sen aruba lenmang nung tetsükdaktsü ajurutsü. Iba jagi tanü Centre aser State tem tsungda kati ka dang petroleum products nung tax ajemtsü shiteper saka telemtetba takang ka magir aser nübortemi totzü jenjang tupet atuba timtem abenba manener. Maneni, Centre aser State nung ruling party temi totzü jenjang atuba anema lungkak aitba sentongtem nung shilem magir kechiyong State sorkartem mesüra Centre naprongi tax ajemtsü memolunger. Külen, opposition party temi totzü jenjang atuba atema lungkak aitba sentongtem ayonga agiaka takok kecha mangur. Taoba ita Prime Minister Narendra Modi-i totzü adokba linüktem dang totzü nung jenjang atuba khuret lemsatap aser jenjang atuba azüoktsü atema yariteptsü shia liasü. Ajisüaka, alima nung linük aikati COVID-19 dak sendakba lockdown agienogo aser rongsenketzung maparen tenzükshio. Iba ajanga petroleum products teimba nungdaka kümogo. 2022 küm tetenzük tashi nung COVID matongdang totzü nungdakba amato nungdaktsü aser kobi melii crude oil barrel ka nung \$100 tashi akümtsü ta mongintemi ashir. Tang India nung totzü jenjang repringshiba inyakyim nung temelenshi kecha melira, crude oil barrel ka nung \$100 akümdang India nung petrol litre nung Rs 150 adentsü akok, saka tang tashi Centre aser State sorkartemi totzü jenjang repringshimtsü maparen kecha metenzük lir. Ano külen, tesüiba ita ishika tsungda Liquefied Petroleum Gas (LPG) jenjang tuyonga arur. Joko tang cylinder ka nung Rs 1,000 tera agi dang matong lir aser iba denji subsidy maliba ajanga nübortem timtemer. Asenoki meyipa repringdangra, July ita nung crude oil barrel nung \$64 agi ayok saka iba mapang petrol nung poisa 65 aser diesel nung Rs 1.25 dang ajema liasü aser meyiper taküm May o July tsungda petrol litre nung Rs 11.4 aser diesel nung Rs 9.15 ajungket. Taküm October ita kija petrol litre nung Rs 7.70 aser diesel litre nung Rs 8.32 tuogo. Anungji India nung totzü jenjang repringshiba ya international crude oil jenjang nung ajemdaker inyakba mapa ka masü saka sorkar meyong totzü company temi sorkar senpongi sen aitaaktsütsü atema inyakba mapa ka dang lir. Anungji, Centre-i shidangba ama petroleum products ya GST kübok dendaktsü nung ang jenjang shitak latettsü aser international crude oil jenjang den liromedema ayoktsü. Iba nung state sorkartem asoshi tebilemstü khuret tuluba lir anungji nübör asoshi tentetba sorkar ta ashir süra, nübortem timtemba angateta state sorkartemi petroleum products ya GST kübok dendaktsütsüubaji molunga agizüktsüla. Kokra, Nagaland state sorkari tangar asoshi tatishitsü sudakja GST kübok petroleum products dendaktsütsü molunga agizük nungbo sorkar atema dang masü saka Naga nunger asoshi konang-nüngsang bentsür arutsü. Sorkar senpongi sen aitaaktsütsüubaji tongtipang saka petroleum products ajanga dang sen arulen bushiba yabo tim masü aser sorkar ketdangsubaren nung tashimaitba sayur.

OLEMSABANG

SÜNGYANGLU "IDOL" INDANG KÜ TANGATETBA

- R. Imkong Lkr, Mangimen

(Yashi adok nungi...)

Temeshi lai meyipzük dang asen Ao oshi nung meyipzükertemi Greek, Latin aser lbri oshi nungiang meyipzük asünungji, item jagi koba aser kechi tangatetba nung "süngyanglu" tenüng ya amshia zulu, asenoki ashitsü makok. Aji oda tanü asenok khrista dak amangertemi iba indang ya jungabo mangateti alitsü ta nibo bilemer. Yamaji iba süngyanglu tetezü ya kanga junga bilemtangyonga ora aikati jungabo meshitettsü alitsü südi ta nibo bilemer. Sürabangla koda ser kechi tangatetba nung "süngyanglu" ta aja? Ni bilem nungbo asen detsü tebou "fore fathers and fore mothers" mapang nungi nisungtem noksa aser shirurudem noksa süng agi jiteta yanglua külema aru nungji item süng agi jiteta yangluba noksatem dangji "süngyanglu" ta aja südi ta amanger. Yamaji temeshi lai meyipertemi iba tangatetba nungji "süngyanglu" ta jaa meyip südi ta amanger, iba jagiang süngyanglu melenaji tanga nungja kar agütsüba mesüra jatsüba angashia maruba tanü tashi lir.

Tanü mapang ya asenoki süngyanglu tetezüji kanga junga bilemdanga shisadangyonga ora iba nungja ya tesem aisü nungbo meputeper ta angateter, kechiba ta süra, tanübo senti osettem tatishitsü agi Hon amala, taribi amala, yongmenyin amala, merang tapu balala agi nisung mesüka yangluba, shiruru tapu aika mesüka yangluba angur, saka itemji süng agi yangluba osettem masü asünungji, item dangji asenoki süngyanglu ta ajatsü makok. Saka koba noksatemsa kechi osettem agi yanglu item tenüngtemji amshia ajatsüla ta nibo bilemer. Tatishitsü agi nisung noksa ka mesüra shiruru noksa ka süng agi jiteta yanglur kari ibaji külemra, iba dangji süngyanglu ta ajatsü akok, aser ano süng agisa jiteta yangluba yipden amala, naro amala, jikok aser jisang amala, ita aser petinu, anü amala, marok aser aousu amala, table aser chair amala ajakji süng agi jiteta yangluba süra, aser kari itemji külemra, item dangjia süngyanglu ta ajatsü tim.

Aser ano tatishitsü agi nisung noksa mesüra shiruru noksatem koba osettem agisa yanglu Hon agi yangluba mesüra taribi agi yangluba, yongmenyin agi yangluba, merang oset agi yangluba item oset aser noksatemji kari külemra, item ajak nungji temenen tanela iadoker alir ta metettsüla. Iba noksatem külemba dangji süngyanglu ta ajatsü makok, saka itemji koba osettem agi yanglu, item oset tenüngtemji agütsütsüla mesüra ajatsüla. Yamai ajatsüla:-

1. Koba oset agi kechi noksa yanglu, tatishitsü agi süng agi yangluba külemra, item ajak dangji süngyanglu ta ajatsüla.
2. Hon agi yangluba külemra hon- yanglu ta ajatsüla.
3. Yongmenyin agi yangluba külemra yongmenyin yanglu ta ajatsüla.
4. Taribi agi yangluba külemra taribi yanglu ta ajatsüla.
5. Aser merang oset agi yangluba külemra merangyanglu ta ajatsüla tim.

Kechiba ta süra koba oset agisa kechi noksatem amshia yanglu, aser kari item noksatemji külemra item ajak nungji temenen iadoker alir ta metettsüla. Kechiba ta süra nisungtemi item dakji tamang kaa külemer ta angatetdi. Aser ano tatishitsü ka yamai agütsür, kari yimtsung ka anasa mesüra arem nung süale, long ka dak azü "blood" rüklokja mesüra mamatzü shilokja külemra, iba long dakji temenen iadoker alir, tetezü iba osetji taküm aliba kibur ka kümdaktsür alir ta metetdi. Yamaji ibala mesükba long dangji longyanglu ta ajatsü akok. Tatishitsü agi tesem kar nung ibala mesükba long kar lira, itemji tanemi tanemi aeiner, "grow slowly" iba amala long dangji english oshi agi "living stone" ta ajatsü akok, kechiyong nisungtemi item amalaji külema külemabo ainer aser tesem kar nungbo item jagi ola-a adoker ta ashir, kechiba ta süra, itemji taküm aliba "living stone" ka ka kümadoker alir ta metetdi.

Ano maneni sa long agi yangluba, süng agi yangluba, yongmenyin agi yangluba, taribi agi yangluba, merang agi yangluba (item) osettemji külema, item tenüngtemji jatsütsüla, saka item ajak dangji "süngyanglu ta majatsüla ta tanaben netshia shisemer. Iba ama oset shiaji bentet benteta ajaba jagiang kecha tebangkatsü aser teratatsü mali ta shisemer.

Asenok ajaki meteta alitsü kaji town "jila" balala ajak nung Hindu nunger "mandir" "temple" lapoka aliba angur, aser yangji ajong den monü agi menok yangluba süngyanglutem angur aser parnoki durga puja mapang nung san, jang, godru, napong tepseta item züji "blood" ajongyanglu dakji rüklokja, mamatzü shilokja külemba asenok aikati ngur alitsü ta amanger, yamaji nia tanur asü dang aiben ngua aruogo. Iba ama külemba jagi item "Ajongyanglu" dakji tanela tamajung iadoker alir, aser oda odabo item "Süngyanglu" "Ajongyanglu" dak nungjagi sayatenya maparen kar adoker, aser tesülenbo iba "Süngyanglu" "Ajongyanglu" nungjagi ola adoker. Tetezü parnoki külemba oset nungjagi mojing tu temai adokatoker ta metetdi. Item amala temenen tsüngrem külemba purtem dangji Hindu nungertem aser Buddhist nungertem ta ajar, koda tesüngmangtsü tsüngremtem iba lima nung lidagi. Yamaji asen detsü teboutemia kasaji külemba aru ta angatetdi.

Yamaji asen tamang tir Elija mapang nunga Ahab chubai annir Baal tsüngrem külemertem parnok 450 ainkartem anitena Karmel tenem nung noktadkaji ainketer Elija den toktepdaktsü. Iba mapang nungji Elija ainketeri pa Tsüngrem jazüka sayatenya mapa tulu inyakba ngua Baal ainketerem parnok 450 jagi ali nung apudaka ashi, "Kibubaji Tsüngre, kibubaji Tsüngrem" ta ayimten. Saka tatem nung Baal ainketerem ajak tu Elija aser par teloki pur annir luagi Kishon ayong nung tepset ta lai nungji angur. 1 Chubatem 18:40. Ahab chubai annir Baal tsüngrem külemertem tanü Hindu nungertem aser Buddhist nunger tsüngremtem mesüka külemba tamangertem liasü ta angatetdi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Pakistan nung Afghan Khristan refugees kanga timtemer



Afghanistan den arrtsülen Pakistan kübok Chaman nung Afghan nungertem refugee camps nung jenoka aliba noksa nung angur.

November 03, 2021: Afghanistan nung Taliban telok dang nungi jena oa Pakistan nung jenoka alir Afghan nunger Khristan refugee temi timtem aika ajangshidar, ta International Christian Concern (ICC)-i metetdaksü.

Talisa Afghan nungi jena aruba Khristantemi lendong nungi jenbutsi atema Pakistan nung pei tamangba yimsü mimshitsüsa akümer.

Taküm August ita nungi Taliban teloki Afghanistan yimsüsüba tenzükba sülen Afghan nunger million aika jena ogo. United Nations High Commission for Refugees-i ashiba agi, Afghan nunger million 2.2 shi jena aoba sülen tang Iran aser Pakistan na nung jenoka lir.

Osangbener den jembidang Pakistan nunger Khristan anati,

"Anogo shia nisung aika jila aser yimtsüngtem adena arur. Tenokdangba kecha mali, anungji arrtsü adena arutsü kanga temela. Pakistan sorkari Afghan nunger refugees kar register süa küm ana atema temporary cards agütsür," ta metetdaksü.

Ajisüaka Evangelical Focus report ajanga ashiba agibo, Afghan nunger refugees aruba atema Pakistan sorkar mepelar. Tawa Pakistan-i, parnoki joko refugees tali magizükettsü, ta metetdakja ozüng alema linük telungi aitba refugees meyipa yoktsü, ta shiogo.

"Parnok Afghanistan telungi aita daksütsü atema International sepaitem aser UN-i inyaksüla," ta Pakistan National Security Adviser, Moeed Yusuf-i tawa metetdaksü.

Pakistan nung Afghan

nunger refugees aika ketdangsertem dang nungi jenshia alir, talisa Afghan Khristan refugee tembo pei tamangba yimsü-a mimshitsüsa akümer.

"Parnok aika mosques nung atsüker. Afghan nunger refugees rongnung Khristan aika aliba agi Pakistan nunger süngmanger. Parnoki pei yimsü mebenshiteter mesüra Tenla kidangi mouteter, kechiyong Tenla kidangi ora parnok Khristantem ta tangari jangjatsü aser pastor-ia timtem ajurutsü," ta Pakistan nunger Khristan kati metetdaksü.

Tang joko asükwa mongpu aruogo, anungji Afghan refugee temi talem süoshi aser tejenokdak nungdaker, ibayongji Pakistan nunger Khristantemi parnok yaritsü bilemer saka sorkar tetuyuba aser wara nung ajemdaker timtem ajangshir.

ANOGO ABEN TSÜNGREM DEN

Walokwatem mesüra tesendaktep?

Aser shinga mesenzüba lima aser nisung shinga malidak, ljjp nungi onok anitetba Kibubaji kong lir ta parnoki tashia mashi. Yeremia 2:6.

Khristan yimsü Yisu Khrista den kanga anasatapa aliba aser Pa den tesendaktep nung ainba lir. Iba yimya süpaa amshitsüba tamang tesayuba ka masü mesüra temenen paitokba masü. Tsüngremi tenyaba mapa ajakji Pa temeim Pa nüburttem den lidaktsütsü atema lir.

Tsüngremi tekülemji asenoki Pa sentsüwangshi ngudaktsütsü aser Pa den apet asenok nungi telangzüba angutsü asoshi tentet, kechiaser aikati ibai yimya süpaba mapa ka, tekülem sentep nung ken atentsüba yimsü ka dang kümdaktsü. Tekülem sentepi aobaji Tsüngrem sentsüwangshia pa den ajuruteptsü nükjitung nung masü saka tekülem sentep nung metenra tangari tamanger masü ta ashitsü tsübuba agi aor aser atener. Tsüngremi tenla agütsüba yimyaji asenoki Pa nüburi, asenoki Pa dang meimba ajunga sayudaktsütsü asoshi tentet; saka aiben asenoki Pa mesüzükba aser asenok aibelenba Pa ain adokba ajema kümdaktsütsü tangatetba nung inyaker. Asenoki Tsüngrem den sensaksemettsü asoshi Pai asenok dang sarasademtsü sayu, saka aiben asenoki ibai sarasadem ajanga raksar "sarasademer" aser asen Tebu mulungjang nung kechi bilema lir aji mangai aritepa toktsür aor. Tsüngremi shirnok meimer parnok kümzüksü asoshi ozüngji tenteta ayu, saka ibai Tebu den tesendaktep yangluba lemanng masü ozüngyim lemanng kaang kümdaktsü. Tamajung nungi kümzükdak lemanng masü saka temerenshi agütsüba lemanng ka kümdaktsü.

Tsüngrem den telungjem nungi pilar tamangba yimsü mapatemji tazüngla walokwatamba lir. Yeremia mapang nung nüburttemi Tsüngrem meteni walokwatamba nung temulung süa liasü. Parnok yimsü nung parnoki temulung lema liasü aser parnok den Tsüngrem matenba parnoki memetetti liasü. Tsüngrem meteni sarasademtsü, tekülem nung atentsü mesüra tenla agütsütsü takoktsü asü? Atangji ibai takoktsü! Khristan aika asoshi ibaji tesasatsü mapa lir. Yisu Khrista den tesendaktep makai yimsü nisung ka tesü. Kodang Tsüngrem dena lidir tepilaji tejangja asütsü.

Kaduna State nung Tenla ki amakdang Khristan ana tepset

JOS, Nigeria, November 03 (Agencies): Amongnü (October 31, 2021) Kaduna state kübok Kakau Daji yim dak Tenla kidang Baptist Khristantem tekülem sentong tagidak mapang nung Fulani teloki amakdang Khristan ana tepset aser aika yirutsüogo, ta Arogo lenirtemi metetdaksü.

Osangbener den jembidang Kaduna Baptist Convention Tir, Ishya Jangado-i, "Anepdang tekülem sentong agiba mapang Tenla kidang Fulani teloki nisung ana tepset aser nisung aika puer ao," ta metetdaksü.

Osangbener den jembidang Kaduna State Chapter, Christian Association of Nigeria (CAN) chairman, Joseph Hayab-i, küm aika Khristantem amaker, saka Nigeria sorkari ozüng alema inyakba mapatem nokdangteter, ta ashi.

Iba dak alia tawa kasa state nung Khristantem aika tepsetogo.

October 25 nüa Zangon Kafaf County kübok Jankasa yim dak Fulani teloki Khristan pezü tepset aser asem yiruja liasü. Kaduna State nung Internal & Home Affairs commissioner, Samuel

Aruwan-i, Khristan asürtemji Luka Nelson, Timothy Koni, Pasi Peter aser George Francis nunger liasü aser injang agi yirurtemji Daniel Dauda, Extra James aser Henry Frances nunger lir ta jangjaogo, ta metetdaksü.

"Yirua alirtemji tang hospital ka nung treatment agidar," ta Aruwan-i metetdaksü.

October 24 nüa Zangon Kafaf County kübok Ungwan Taila yim dak Fulani telokisa Khristan ana tepset. Yim daklir Ayuba Musa-i, "Nikongdang 4:30 ako meta parnoki ozü yim amak aser injang mashie-mashie khadok. Khristan ana kaset aser aija yirutsüogo," ta metetdaksü.

October 11, 2021 nüa Zangon Kafaf County kübok Lisuru Gida yim dak Fulani teloki Baptist pastor ka den Khristan ka kaset, ta yim daklir Yakubu Luka-i metetdaksü.

"Pastor jagi pa asütsü ta meteta liasü, saka pai Khristan yimsü metoktsütsü ta ashi. Ibayongji pa den par Arogo züngsem ka densema kaset. Yisu Khrista atema asübaji amajok masü, aser ibaji tejangja," ta Luka-isa ashi.

Kaduna State Chapter,

Christian Association of Nigeria nungi Hayab-i, sepaitemi aibelenertem mita aoba nung yariseptsü atema sorkari telecommunications services shibangtsüba ajanga tang tashi parnoki pastor tenüngji mejangja, ta ashi.

Paisa, "October 11 nü pastor aser Khristan ka na alu nungi meyipa kidangi shilangba mapang nung tenaprongla kaset. Tang onoki tensa tamajung ajangshidar; kecha kuli makai Khristantem aika tepseter. Iba tensa nokdangtsü aser anogo shia Khristantem tepsetba nokdangtsü atema rongdak süa langkabosa inyaksüla," ta ashi.

Yaküm (2019 November nungi 2020 October tashi) alima nung Khristantem timtiba tepsetba linükji Nigeria liasü. Küm ka tsüngda Nigeria nung Khristan 3,530 tepset. 2019 küm nungbo Nigeria nung Khristan 1,350 dang tepseta liasü (Open Doors' 2021 World Watch List report).

Tang alima nung Khristantem tamajungba reshikangshiba linüktem rongnung Nigeria ya jenjang 9buba nung lir.

Nigeria nung Khristan

lenirtemi ashiba agi, Nigeria Middle Belt nung Fulani teloki Khristantem amakba nükjidong ya Khristantem meyong li aser alu rakzüka agitsü, kiset shiruru alu nung chiyimdaktsütsü aser Islam yimsü benoktsü atema lir.

APPG ajanga ashiba agi, 2015 küm Nigeria Tir, Fulani nunger Muhammadu Buhari shima liasü, ajisüaka linük Middle Belt nung par nisungtemi ozüng alema inyakba mapatem nokdangtsü atema pai kecha meinyaker.

Taküm August ita kija nunga Kaduna State nung Fulani teloki Khristan 36 tepseta liasü.

August 4 nungi tenzuka August 28 tashi nung Zangon Kafaf, Kaura aser Chikun counties nung Khristantem amakdang Doh (Mado) yim dak Khristan 17 tepset, Madamai nung pongu, Buruku aser Udawa na nung ti, Machun nung asem aser Goran Gida nunga Khristan asem tepseta liasü.

Fulani Muslim nunger ya lisopurtem lir aser parnok timbakati Khristantem den yimjung nung alir, ajisüaka Fulani kiralongrartemibo Khristantem tepseter, yimtsüngtem amaker aser Khristantem meyong ali

rakzüka agir.

ICC Regional Manager for Africa, Nathan Johnson-i, "Khristantem dak taocha makai tepsetba ya anentsüla. Nisung aika tepseter saka tekümzükerbo mali, iba denji külemi sorkari teyari magütsür, ibaji ajanga aibelenertemi maneni Khristantem anema inyaker. Khristantem amakba nokdangtsü atema Nigeria sorkari inyaksüla aser aibelenertem nem temerenshi agütsütsüla," ta metetdaksü.

Religious freedom anema inyakba atema yaküm December 7 nü U.S. State Department-i Nigeria linük-a Countries of Particular Concern (CPC) linüktem rongnung züngokogo. CPC linüktem rongnung Burma, China, Eritrea, Iran, North Korea, Pakistan, Saudi Arabia, Tajikistan aser Turkmenistan linüktem densema lir.

Tawa U.S. State Department-i ISWAP, Boko Haram, Al-Shabaab, Al-Qaeda, Hayat Tahrir al-Sham, Houthis, ISIS, ISIS-Greater Sahara, Jamaat Nasr al-Islam wal Muslimin aser Taliban teloktem ya "Entities of Particular Concern" nung züngokogo.

OLONG PAITEP # 5986

1		2			3		4			5
				6		7				
8										
						9				
			10							
11										12
					13			14		
15										
16								17		

TIPIEN		LANGTSÜNGLEN	
1. Nüji masü	- (4)	1. Jila tulu	- (5)
3. Techinütsüka	- (6)	2. Sarasademdang tembang	- (4)
7. Aketa shirangba	- (5)	4. Tarutsü indang ashirtem	- (6)
8. Pi	- (6)	5. Alia	- (5)
9. Amena	- (5)	6. Mojing	- (5)
10. Kinü	- (5)	9. Tai inyakba metet	- (5)
11. Tanang masü	- (5)	10. Medemer chijiba	- (6)
13. Lenmang	- (6)	11. Tatokba / Amadok	- (5)
15. Nübo tedi	- (5)	12. Anüngdang masü	- (5)
16. Tuoshi	- (6)	14. Jabaso masü	- (4)
17. Shiruru apuba temenatsü	- (4)		

OLONG PAITEP # 5985 TELANGZÜBA

TIPIEN :		LANGTSÜNGLEN :	
1. Tesangra, 5. Mungo, 7. Kisen,		1. Temesen, 2. Raksa, 3. Aon, 4. Aso,	
8. Salem, 12. Semki, 14. Kilem,		6. Nile, 9. Alizüng, 10. Omen,	
15. Kensü, 16. Sangpang.		11. Lemta, 13. Ola, 14. Kin.	



ALOKBA OKADAK NOKDAKER :

Alokba, na küm 25 tashi jail nung lia aruogo, anungji tanü jail nungi chiokra nai joko mauyai litettsü asü masü ?

Ohh!!! Okatsür, ibaji kanga tezüba lir. Jail nungi chiokra ni Politician akümtsü, kechiba süra politicianibo auyayonga ibaji ozüngi melar!!!

AO OSHI ANGAZÜKDAK:
TANÜ ANGAZÜKTSÜBA OJANG

Lenjang
 (n) lenmang tiyong (middle of the road)
 * Gari lenmang **lenjang** nung mejajatsüla.

Lenjem
 (n) lenmangtem ajurutepdak (junction)
 *Onok medemertem **lenjem** nung ajuruteptsü jembi.

Happy Birthday

TENÜNG : TEMSUKOKLA JAMIR
 Tasoba küm : 04-11-2008
 Küm : 13 years
 Class : 7
 School : El - Shaddai Academy, Dimapur; Nagaland.
 Talidak : Taxes colony, Lengrijan.
 Kechia timtim mali tanu tashi arudaktsüba asoshi Tsüngrem tenüng asanger. Ano maneni arishi talang moajang ta sarasademtsür.
 --Temeim Oja, Oba, Otsü & Obu

TANÜBO NAI LANGZÜANG

Q. Tawa India's Chief Election Commissioner (CEC) Sushil Chandra-i koba linük Tir Election atema nung acha-ayanga liasü ?

[A] Singapore [B] Uzbekistan
 [C] Sri Lanka [D] Thailand

(Taruba adok nung onoki langzüsü)

YASHI ADOK TELANGZÜBA : Rajnath Singh

SUDOKU # 6027					TELANGZUBA # 6026												
4	7			1	3	3	4	2	5	7	6	9	1	8			
			9		6	1	7	6	9	8	4	3	2	5			
9	5	1		6	8	5	8	9	2	1	3	7	6	4			
7	9				1	4	2	3	7	6	5	8	1	4	9		
	5	8		9	6	2	6	5	8	1	4	9	2	3	7		
6	2	4			5	8	9	9	1	4	7	3	2	8	5	6	
		2		5		3	1	4	9	5	8	2	1	6	7	3	
5			3	7			8	7	6	1	3	9	5	4	8	2	
3			2		4	9	6	5	8	2	3	4	6	7	5	9	1

OJANG LUTEP # 5573

ANI :

LUKTUA :

AIAM :

LEMAKBIA :

TENÜBURM :

ERAS :

ÜNGRTSEMI :

NGOKMEZÜRA :

BAIJI :

TEMPTAANG :

OJANG LUTEP TELANGZÜBA # 5572

TEINYAKTSÜ JENTI LIKA TONGTIBANG MAPAREN
 TAMASA TEMULUNG AGÜJA INYAKADOK TAJUNGBA

TAN HOPTA ATEMA - KOMA SÜLA ?

Q. Tazünger maliba aser tazüngertem aliyonga tazüngertem dang nungi tesayurtemang teimba aliba government school-tembo ajak shibang nunga koma süla ?

Olong 20 shi nung November 05, 2021 tashi nung iba telangzuba ya onok dangi (e-mail - tiryimiyim@gmail.com) :
 (SMS - 9856121232 / 9436072422) : (WhatsApp - 7005723372 / 8729995804) : (tiryimiyim.in) ajanga yokang. Telangzubatemi taruba Honibarnü adoktsüsü.



November 03, 2021 nü New Delhi nung Union Finance Minister, Nirmala Sitharaman-i Ministry of Steel indang Capital Expenditure (Capex) review senden nung adenba noksa nung angur. Kasa noksa nung Ministry of Steel Secretary, Pradip Kumar Tripathi aser ketdangsertema angur.

Byelection nung Cong-i BJP madak takok angu: Randeep Surjewala

New Delhi, Yimpoksüi/ November 03 (Agencies): Mongolbarnü by election vote zünga osang sangdongba sülen Bodhbarnü Congress lenir tain, Randeep Surjewala-i, by elections nung Congress-i BJP madak takok nguogo; sorkari aluyimba ozüing asem agientsüla aser petrol-diesel totzü nungi auyaba anentsüla, ta metetdaksü.

Himachal Pradesh nung Congress-i BJP meyong aliba assembly menden ana nung takok angu aser Karnataka nunga BJP meyong aliba assembly menden ka nung takok angu.

Iba ya Congress-i BJP madak takok anguba lir, ta party-i metetdaksü.

Bodhbarnü Congress Party lenir tain, Randeep Surjewala-i twitter ajanga, "BJP-i Lok

Sabha menden asem nungi menden ana nung tamakok angu. Assembly elections nung Congress den indang-indanga toktepba menden timbaka nung BJP-i tamakok nguogo. Himachal Pradesh, Rajasthan, Karnataka aser Maharashtra nung ibaji kuli nguogo. Modi tekong merangba anenang! Ozüing tanak asem agienang! Petrol-Diesel-Gas nungi auyaba anenang! Nüburtem timtem mezüngshibaji majung," ta metetdaksü.

"Congress-i takok anguba ajakji ozü party nung inyakertem takok lir. Tesempa anema maneni raradi. Tetsübu!" ta Congress lenir Rahul Gandhi-i twitter ajanga lemsatop.

Himachal Pradesh nung yimtenren lenirtemi, nüburtemi sorkar dang jashiba, petrol aser diesel jenjang atuba den mapa

manguba onüktem nung ajemdaker BJP-i tamakok angu ta züngshir.

Karnataka kübok Hangal nung Congress candidate Srinivas Mane-i BJP candidate Shivaraj Sajjanar madak vote tali 7,000 agi takok angu.

Assembly menden 30 aser Lok Sabha menden 3 by elections nung Congress-i menden 9 aser BJP-i menden 8 nung takok angu. BJP-i Assam nung menden pongu nung takok angu saka West Bengal, Himachal Pradesh, Karnataka aser Rajasthan state tem nung party meyong aliba menden trok nung tamakok angu.

West Bengal nung Trinamool Congress-i assembly menden pezüprongla nung takok angu; state nung BJP-i party menden ana manguba dang masü saka vote shilem-a tajemba aküm.

Vaccine certificate nung PM noksa mamshitsü mepishibaji majung: HC

Kochi, Yimpoksüi/ November 03 (Agencies): Kerala high court-i, coronavirus vaccine certificates nung Ato kilonser, Narendra Modi noksa mamshitsü atema mepishibaji majung, aser iba nungji lendong keta lir, ta metetdaksü.

Peter Myaliparambil-i vaccine certificates nung Ato kilonser noksa mamshitsü atema temepishiba ken o agütsüba angadanga mapang nung Justice N Nagaresh-i, iba temepishiba nungji lendong keta lir, kechiyong ano nisung kari sen nung keta aliba Mahatma Gandhi noksa mamshitsüla, ta court dang mepishitsüa akok;

nisung kari sen nung linük lenir noksa mamshinüra kechi ataloktsü, ta ashi.

Temepishiba ken o agütsüsang atema jembitsür advocate Ajit Joy-i High Court dang, sen nung Mahatma Gandhi noksa keta menüngbaji Reserve Bank of India (RBI) regulation nung ajemdaker yanglu, saka vaccination certificates nung Ato kilonser noksajibo ozüing kar nung ajemdaker inokba masü, ta ashi. Court-i maneni iba ken o ya November 23 nü angadangtsü.

Mongolbarnü Kerala HC bench kati, Centre sorkar indang vaccination scheme nung senso

telemsa ana kümogo- Covaxin vaccine agirtem aser Covishield vaccine agirtem tsüingda telemsa adokogo, ta metetdaksü.

Covaxin vaccine agirtem bendangleni aini aotsü nokdang saka Covishield vaccine agirtemibo tesem mashie aotsü akok.

Covaxin vaccine agir alir tebur kati vaccine tasembuba dose agiba sülen Saudi Arabia-i aotsü atema court dang iba vaccine agirtemia alima tesem balalai otettsü atema iba vaccine agizüksüla, ta court nem temepishiba ken o agüja liasü.



November 03, 2021 nü Ato kilonser, Narendra Modi-i Scotland nung India nunger ajurudang tangokba noksa nung angur.

Dengue tashidak tali prokba states/UT 9 dangi central team yok

New Delhi, November 03 (Agencies): Union health ministry-i tang linük nung dengue tashidak tali putetba state aser union territories 9 dangi mongin teams yokogo.

Dengue tashidak anema raraba nung item team-i state ketdangsertem den yariteptsü.

Hombarnü Delhi nung dengue tashidak atema review senden ka amenba mapang nung Union Health Minister, Mansukh Mandaviya-i central teams yoktsü tuyua liasü.

Tang dengue tashidak kanga putetba states aser union territories 9 ji Haryana, Kerala, Punjab, Rajasthan, Tamil Nadu, Uttar Pradesh, Uttarakhand, Delhi aser Jammu & Kashmir lir.

Mandaviya-i health ministry dang dengue tashidak tali prokba states aser union territories nung sorkartem den

yaritepang, ta tuyua liasü. Linük nung item states aser UTs nung nisung 1,16,991 dak dengue tashidak putetogo.

State kar nungbo yaküm October ita den medemrangra taküm October ita nung ang nisung timba dak iba tashidak putetogo.

States aser union territories 15 nung iba tashidak kanga putetdar aser October 31, 2021 tashi nung linük nung iba tashidak putetba shilem 86 bo item states aser UTs nung lir.

States aser UTs dangi yokba Central teams nungji National Vector Borne Disease Control Programme (NVBDCP), National Centre for Disease Control (NCDC) aser Regional Offices nungi mongintem densema lir.

Central teams jagi mapang shia state health ketdangsertem nem report agütsütsü.



November 03, 2021 nü Chikmagalur (Karnataka) nung Deepavali benjung mapang Hindu nunger tamangertem Deviramma tetsür-tsüngrem dang sarasademtsü atema Devirrama tenemi atuba noksa nung angur.

Glasgow nung Climate senden alidang PM Modi-i Nepal PM ajuru

New Delhi, November 03 (Agencies): Glasgow nung COP26 Climate summit alidang jurila senden ka nung India Ato kilonser, Narendra Modi-i Nepal Ato kilonser, Sher Bahadur Deuba ajuru; taküm July ita nung Deuba Nepal Ato kilonser akümba sülen tang mezüng Modi-i pa ajuru, ta ketdangsertemi metetdaksü.

Lenir anati linük ana tesendaktep ano tajungba akümtsü atema jembiba den külemi climate change aser Covid-19 anema longjemer raratsü aser wara sülen asentenshiba nung amaliteptsü atema o lemtepa liasü, ta Ministry of External Affairs (MEA)-i metetdaksü.

"Lenir anati wara mapang India aser Nepal nati amalitepa inyakba, talisa India-i Nepal nem vaccines, mozü aser medical osettem agütsüba, iba denji külemi arrtsü adena osettsüset sademsadema belenshitsu atema inyaka aruba jemi," ta MEA sangdong nung shia lir.

Wara sülen lenla ajak asentenshiba nung linük anati longjemer inyaktsü atema lenir

anati bangjemogo, ta MEA-i metetdaksü.

Hombarnü COP26 climate summit mapang jurila senden nung Ato kilonseri linük balala nungi lenirtem ajurua liasü.

Modi-i Ukraine Tir, Volodymyr Zelensky-a ajuru aser tenati linük ana tsüingda tesendaktep aser region nung tatalokbatem atema jembiba liasü.

Iba senden nung Modi-i India nung coronavirus wara tamajungba mapang Ukraine linüki India nem oxygen concentrators agütsüba atema Zelensky dang pelaba lemsatop.

Lenir anatisa linük ana nungi nüburtem tsüingda tesendaktep tajungba akümtsü atema jembigo, talisa Ukraine nung aliba University balala nung India nunger kaketshir aika züngdar, ta MEA sangdong ajangasa metetdaksü.

Lenir anati Ukraine aser India tesendaktep ano tajungba akümtsü atema longjemer inyaktsü asoshi bangjemogo, ta Ministry of External Affairs otongdar, Arindam Bagchi-i twitter ajanga metetdaksü.



Glasgow, Scotland nung United Nations Climate Change Conference 2021 agiba mapang India indang External Affairs Minister S Jaishankar aser UK Foreign Secretary Liz Truss na külemi tangokba noksa nung angur.

Afghanistan nung bendanger sen amshiba Taliban-i nokdanger

Kabul, Yimpoksüi/Nov. 03 (Agencies): Taliban-i Afghanistan nung bendanger sen (foreign currency) khenyongi mamshitsü osang sangdongogo, anungji parnok i iba linük amokbangba ajanga bendang linük nungi teyari ajungbena agiener rongsenketzüng telaor aliba nung maneni tetsükdaktsü agütsütsü.

Linük yimtiba, Kabul nung Afghanistan mitkar indang mozüki tulutiba nung bomb poklokja prangbong agi amakba ajanga nisung 19 takum samatsür ano aika yirutsü lia ajungbena iba osang ya Mongulbarnü sangdonga liasü.

"Nübur, dokan kibur, shishilembar ajunga dang Afghanis nung senotsü tsütateptsü aser bendanger sen amshiba nungi pila alitsü Islamic Emirate ajanga totuyuba agütsür," ta Taliban-i ashi ta odongtar Zabihullah Mujahid-i online nung sangdong ka post sütsü.

"Iba totuyuba nung aibelener tem temerenshi agütsütsü," ta sangdong ajanga ashi.

Afghanistan shishilempadak

US dollar kanga pulua amshir, aser arütsülen shishilempatsü atema Pakistan ama kidanger linük indang sen amshir.

Taliban sorkari central bank nung sen dollar billion aika rizünga aliba salatsü ajungshir, kong tziünga-rusa agi kongshir aliba linük nung sen agi anünger, nüburtem tepok mesüngteter aser danga lima bushia aotsü tenzüker.

Afghanistan nung anüolen linüki yariba taoba sorkari United States Federal Reserve aser Europe nung danga central bank tem nung sen dollar billion aika jenjang rongsen yua lir.

Saka August ita Taliban-i linük amokbangba sülen US, World Bank aser International Monetary Fund (IMF) ajanga Afghanistan nem sen aser loan billion \$9.5 dak tali magütsütsü telemetba agi.

Afghanistan nung 2018 nungi chiyongtsü agi tamajungba anünga akum.

Iba telemetba yagi Afghanistan indang healthcare aser danga sector tem nung kanga mejungi kongshitsü, koba

linük balalai teyari magütsüba ajanga timtema mapa inyaker.

Afghanistan nütsüng yongsük million 39 aliba nungi nisung million 22.8 shi chiyongtsü agi anünga akumer aser tepok mesüngi akumer, ta World Food Programme ajanga ashi. Ita ana tejakdang nisung million 14 iba tia nung liasü.

Taliban-i mamokbangdanga tzümpung melenba ajanga Afghanistan nung chiyongtsü nung timtem ajurua liasü.

Teyari agütsüba telok temi linük balala dang Taliban yimsüsüba kübok teyari agütsütsü ajungshir aser 2015 kum Syria nungi nüburtem ainshia Europe anokshitsüba ama kasa timtem nungi jenbua alitsü ajungshir.

US-i aniba sepaitem aser linük balala nungi senotsü teyari agütsürtem Afghanistan yutsür aoba ajanga nübur dak indokba quarter asem tarulen mali akum.

Anogoshi saru nung sen 400 million Afghanis (\$4.4m) bendener, ta finance ministry ajanga ashi.

Ethiopia nung state of emergency sangdonger

Addis Ababa, Yimpoksüi/Nov. 03 (Agencies): Ethiopia northern tsütsü Tigray region nungi sorkar anemba sepaitemi linük yimtiba, Addis Ababa tsütsü arutsü amokmerenba mapang ka nung tang nungi tenzüka linük tesem ajungalen state of emergency alitsü atema cabinet-i sangdongogo aser linük yimtiba kumzüka ayutsü atema nüburtem dang renema alitsü ashi.

"Linük tesem kar nung kiralongrar TPLF teloki azüdokshia mapa tamajung inyakba nungi nüburtem kumzüka ayutsü nükjidong nung state of emergency ya sangdonger," ta sorkar den sendaktepa aliba Fana Broadcasting ajanga Mongulbarnü ashi. Tigray People's Liberation Front (TPLF) ya kum ka shi federal sorkar den rara arur alitsü.

Ita trok atema sangdongba state of emergency yagi lenmang mokdangtsü melar, transport services nung kongshitsü, curfew tem benoktsü aser tesem kar mitkartemi agitsü. Nisung kar kiralongrar telok den sendaktepa lir ta temolung melemi bilemertem court nungi temelaba meliaka aputsü, military service atema arishi kum agi tonger aliba nüburtem raratsü asoshi ajatsü.

"Asen linük alitsü, tematiba tashi aser telongjem lendong tulu ajurur. Item lendong ya teti amshiba law enforcement system agi mepaidoktetsü," ta Justice Minister Gedion Timothewos-i osangbener senden ka nung ashi.

Iba emergency nung aibelena kiralongrar teloktem nem

senotsü, osettsüset aser molungsenttsü agi yariteper tem kum asem nungi ter tashi tepuokdak ayutsü.

TPLF temi anogo ishika tsüngta anasa aliba Amhara region nung tongtipang Dessie aser Kombolcha jilatem agiogo ta sangdongba aser south tsütsü Addis Ababa bushia arutsü amai sayuba ajanga iba mera ya agi.

Linük yimtiba nungi kilometre 400 shi pilar aliba tongtipang jila ana nungya sepaitemi tang tashi rarar, ta sorkari ashir.

Ethiopia north tsütsü ya timba nung osangtsüsang magitepteter aser osangbenertem aotsü memelar, anungji tongpang nung takok anguba osangtem ya oa mejangjateter.

Hombarnü Addis Ababa nung aliba ketdangsurtemi yangji alirtem dang parnok indang nok-o-nü ananü tsüngta zülüoktsü aser yimti kumzüksü atema renema alitsü ashi.

TPLF temi army camp tem amakba mechi telangzüba agütsütsü atema 2020 kum November ita Ethiopia Ato Kilonser Abiy Ahmed-i Tigray bushia sepaitem yoka liasü. TPLF temi federal sorkar aser Eritrea densema par den sendaktepa alirtemi osangtsüsang agitepa parnok dak amaker, ta ashi.

Abiy-i tekeratiba nung takok angutsü nangzüik, saka June ita tatemlen tashinung TPLF züngsemtem tanaben telong tentetshi aser region timba tanaben agia liasü. Iba sülen anasa aliba Afar aser Amhara region tem nunga raraba ya prokshia aor.

(Maneni tapak 9 nung...)

Sudan nung tashi lemdanger yimsü asütsü jembir

Khartoum, Yimpoksüi/Nov. 03 (Agencies): Taoba hopta mitkartemi tashiyim amshia sorkar atsüngdokba sülen linük balalai iba maparen meyipa agütsütsü ajungshiba mapang ka nung Sudan army aser yimten yimsüsürtem tashi lemdanger yimsü asütsü atema jembishinüba tatem kati arur, ta iba jembishinü nung shilem agir kari Bodhbarnü ashi.

Mitkar lenir Abdel Fattah al-Burhan, taoba mapang sorkar anemer telok nungi lenirtem aser Ato Kilonser menden nungi atsüngdoker alisang Abdalla Hamdok nungertem tsüngta Mongulbarnü linük yimtiba, Khartoum nung maneni jembishinüba liasü, ta United Nations odongtar kati ashi. Jembishinüba nung terenlok liaka, tongtipang onük kar nung opang mapu lir aser jembishinü nung takok angutsü indang meshitetsü.

October 25 nü civilian-i aniba sorkar atsüngdokba ajanga Horn of Africa region nung nisung ka kijai yimsü asüba aser rara agi sünger aliba ajemtsü teimla aliba samatsü.

"Parnoki tekeratiba nung

tatem kati arutsü amai bilemer. Sudanese actors, South Sudan, African linüktem aser UN densema animesor jembishinür aika lir," ta taoba mapang Sudan mitkar nung chief of staff inyaka alisang, Imad Adawi-i Cairo nungi ashi.

Mitkari tashiyim amshia sorkar atsüngdokba anema linük balalai kanga kera taittsüba osang sangdong, Hamdok aser par külem tenzüker pua aliba chioktsü atema takangba agüja US aser World Bank ajanga teyari magitsü akum.

2019 kum nüburtemi kongkak aitba sülen mapang talangka nungi yimsü süa arusang Omar al-Bashir atsüngdoker US-i Sudan den tesendaktep tasen ka tenzüksü arur.

Tamang katettsü atema administration tasenba nung tang kidang pua alisang Hamdok aser pa den külemi tenzüker lenirtem dendaktsütsüla, ta diplomats temi ashir. 2019 kum sülen Sudan nung civilian aser mitkar lenirtemi yimsü süa arua liasü.

Hombarnü Hamdok-i pa indang sorkar tanaben

amenokshiba ajanga linük nung tebilemetsü koktetsü atema lenmang lapoktsü, ta shia liasü.

Ato kilonser menden nungi atsüngdoker alisangi par sorkar ya adangjiba lir ta nenshia ashi, ta information ministry ajanga par Facebook page nung shia liasü.

Tang jembishinüba nungya Hamdok nem tashi tuluba agütsütsü saka cabinet tasen ka alitsü, anungji mitkar aser nüburtem asoshi tajungba alitsü,

ta nisung kati pa tenüng meimshia ashi.

Sudan ya 1956 kum nüjiso anguba sülen mitkartemi timba yimsü süa aru, aser parnok ya sorkar indang tashi tulu aliba security aser defence council ketdangsur asütsü.

Al-Burhan-i anir aliba executive body temaba, sovereign council tasen ka tentettsü asoshi tang tejembidak lir, ta ashir.

Cabinet shimtsü atema

mitkar aser yimten yimsüsürtem tangatetep kati marur, ta nüburtemi ashir.

Democracy lenmang tanaben lapokshiba nung ajemdaker Sudan indang rongsenketzüng aser senttsüh atema teyari agütsütsü, World Bank aser International Monetary Fund dena lir ta mitkartemi meteta lir, ta US special envoy for the Horn of Africa, Jeffrey Feltman-i Mongulbarnü ashi.



Remot agi amshiba satellite telok ka China northwest tsütsü Jiuquan Satellite Launch Center nungi November 3, 2021 nü anüngleni khaketa yoka liasü. Yaogan-32 satellite kibong nungi telok tanabuba ya Long March-2C rocket nung inoker nikongdang 3:43 (par mapang) nung anünglaki yoka liasü.

Meghalaya nung Congress tarutsü majung: NPP

Shillong, November 3, 2021

(Agencies): Meghalaya nung Congress indang tarutsü tia majung lir ta National People's Party (NPP)-i metetdaksüogo.

Meghalaya nung by-election result adokba sülen NPP lennir aser Deputy chief minister Prestone Tynsong-i iba olen jemi.

By-election agiba result adokba sülen Mongulbar nikongdang Meghalaya CM Conrad Sangma, Deputy CM Prestone Tynsong aser Rajya Sabha MP WR Kharlukhi nung dena NPP lennirtemi osangbener den senden ka amen.

MDA teloktep nem takok ngudaktsüba constituency asem dang pelar ta Meghalaya chief minister aser NPP national president Conrad Sangma-i ashi.

"Item constituency nungi MDA nem takok ngudaktsü. Nübertemi onok dak tamang akar" ta paisa ashi.

Meghalaya Democratic Alliance (MDA)-i assembly menden 3 atema by-election agiba ajak nung takok angu.

National People's Party (NPP)-i menden 2 aser parnok den yariteper United Democratic Party (UDP)-i

menden ka nung takok angu.

Rajabala nung NPP candidate Abdus Saleh aser Pyniaid Sing Syiem nung NPP candidate Pyniaid Sing Syiem nati takok angu.

Külen, Mawphlang constituency nung UDP candidate Eugeneson Lyngdoh-i takok angu. October 30 nü agiba by-election nung opposition Congress-i menden ka nung danga takok mengutet.

Taoba mapang Congress-i menden ana nung takok ngua liasü saka tan by-election nung parnoki NPP tsüngdang tamakok nguogo.

Broadband ajungkettsü atema DoT-i benokba Union Cabinet-i agizükogo

Dimapur, Yimpoksüi/

November 3 (TYO): Department of Telecom (DoT)-i Prime Minister's Wi-Fi Access Network Interface (PM-WANI) kübok Public Wi-Fi networks ajanga Broadband proliferate ajungkettsü atema benokba, Ato Kilonser Narendra Modi tekolak ser Union Cabinet-i agizükogo.

PM-WANI framework ajanga shishilembaba maparen tayongba kümdaktsür aser local dokan aser establishment

tilalatem Wi-Fi Hotspot providers (PDO) akümtsü ajungshir.

O/o Sr. DDG, North East LSA, Department of Telecom, Shillong-i, PM-WANI entrepreneurs tem den November 5 nü ON-LINE sentong ka ayongzüka agitsü renema lir.

Iba sentong nung züngoksema aliba aser prospective Public Data Offices (PDO), Public Data Office Aggregators (PDOA) aser App Providers tem

Department of Telecom nung ketdangsür tejentem den sensaksemtsü atema maongka angutsü.

ON-LINE meet nung parnoki ken o jangjanübatem asüngdangtetsü aser PM-WANI scheme ajungkettsü atema tasatema agütsütetsü.

Iba senden nung shilem agitsü atema Email :adg.nelsa-dot@gov.in ajanga züngoksemettsü, ta DDG(T), O/o Sr. DDG, NE, LSA-i sangdong ka ajanga metetdaksü.

AR-i sentong balala ayongzüka agi

Dimapur, Yimpoksüi/

November 3 (TYO): HQ IGAR (North) tawabanga kübok Assam Rifles Jalukie Battalion-i, November 3 nü Peren district kübok Ngwalwa yimtsüng nung amenoker aliba Senior Citizens Home nung alir tintet rogo par trok nem teyari balala agütsüogo.

Iba sentong ya Deepawali benjung amungba mapang Assam Rifles sepaitem ayongzüka agi, koba Senior Citizens Home nung alirtem kanga pelashishia agizükogo. Kasa mapang nung parnok nem, COVID wara pokteter aliba mapang tinyaktsü aser minyaktsütem aser

merekmeju alitsü aser ita tetsüngda ita inyaksangshitsüba amala tangazükba balala agüja liasü.

Maneni parnok dang COVID vaccine agiba tajangzük indang lemsatapa liasü. Sentong nungsa home quarantine, isolation, social distancing, chiyongtsü shidak achiba, merekmeju aliba amala onüktem dak sendakba nung tangazükba agüja liasü.

Kasa mapang nung Assam Rifles, Kiphire Battalion-i, Kiphire District kübok Pungro jila nung November 2 nü merekmeju sentong ka ayongzüka agiogo.

Jila merkettsü nükjidong nung iba sentong ayongzüka

liasü. Merekmeju sentong tajung ayongzüka agiba atema jila nung aliba nübertemi AR dang kanga pelaba lemsatepogo. Iba merekmeju sentong nung nisung 25 shi-shilem agia liasü.

Sentong agiba mapang merekmeju alitsü koda tongtibang, iba indang metetdaksü. Jila nung alirtem dang tashidak wara balala nungi Nagaland jenboa alitsü atema parnok aliba tesem mereka ayutsü ajungshia liasü. Kasa mapang nung nübertemia Nagaland tashidak wara balala nungi jenboa toktsütsü atema merekmeju alitsü tenangzükba agüja liasü.

Arunachal nung telungpur asem bendanga agütsü



Kohima, Yimpoksüi/

November 3 (TYO): Spear Corps kübok HQ IGAR (North)-i telungpurtem bendanga agütsüdaktsütsü atema tanen makai inyakba süngjang tanga Arunachal

Pradesh, Longding District kübok Nginu yimtsüng nung NSCN (IM) züngsem ana aser NSCN-K (YA) züngsem ka bendanga agütsüogo. Parnok asempronglai pistol kaka bener liasü.

Item telungpurtem bendanga agütsüba ajanga iba tesem nung inyaksangshia aliba tanungba telungpurtema bendanga agütsütsü atema ajungmesotsü. Telungpurtemi parnok timtem tekangshi aika ajangshiba lemsatepogo aser külem züngsemtem dang azütokshiba lenmang toktsütsü ayongzükogo.

Telungpurtem bendanga agütsüba ajanga security forces inyakyim tajung jangjatsür aser iba tesem nung yimjung asoshi maneni inyakba sayur, ta PRO (Def) Kohima, Lt Col Sumit K Sharma-i sangdong ka ajanga metetdaksü.

Sür küm ka ajungba anogo bilemteter Asür Imkongrenla



17/07/81---04/11/20

Nai onok doktsür or küm ka jungogo; onok dang meimba aser bendanga agütsüba kanga menungra bilemteter, na onok den mali kangasa shisangra.

Kanga menungrar

Temeim kinungbu, jabaso aser kinungtertem



Department of Social Justice and Empowerment
Ministry of Social Justice and Empowerment
Government of India

Invitation of Expression of interest

National Action Plan for Drug Demand Reduction (NAPDDR) scheme kübok District De-Addiction Centres amenoktsü/achaayangtsü atema temsüa aliba lokti tentettem nungi Interest-cum-proposal lemsateptsü jaoker.

Temsüa aliba lokti tentettemi teküboklen agüja aliba district tem nung District Collector den longjemer District De-Addiction Centres amenoktsü/achaayangtsü. Kasa mapang nung District Administration-i tanenzükdak agütsütsü aser Agency koba shimdir parnoki professional yimya nung DDAC amenoka achaayangtsü.

1. Assam (Karimganj) 2. Arunachal Pradesh: (Changlang, Upper Siang, Tirap, Lohit aser Namsai) 3. Daman & Diu (Daman) 4. Delhi (Central Delhi) 5. Gujarat (Porbandar) 6. Haryana (Ambala, Kurukshetra) 7. Jammu & Kashmir (Kulgam) 8. Jharkhand (Simdega) 9. Kerala (Mallapuram) 10. Madhya Pradesh (Narsinghpur, Satna) 11. Nagaland (Mon) 12. Rajasthan (Ajmer, Alwar, Banswara, Bhilwara, Chittorgarh, Churu, Jhalawar, Jhunjhunu, Pali, Pratapghar, Rajsamand, Sikar, Udaipur) 13. Uttar Pradesh (Agra) 14. Uttarakhand (Chamoli) 15. West Bengal (Siliguri).

Iba mapang agizüktsü jangraba lokti tentettemi Ministry of Social Justice and Empowerment indang website (www.socialjustice.nic.in) aser e- Anudaan (<https://grants-msje.gov.in/ngo-login>) semdanga parnok temsüa ali mali, DDAC shilem, senotsü inyakyim, selection inyakyim aser tanga osangtem agitsü. Proposal ya Ministry indang e- Anudaan portal nung benoktsü. Proposal benoktsü atema tatembangbuba anogoji 30.11.2021 asütsü.

davp 38101/11/0019/2122

Mon DC-i HNB dang kanga pelaba lemsatep

Dimapur, Yimpoksüi/

November 3 (TYO): DC Mon, Thavaseelan K, IAS-i November 2 nü Covid-19, Mon District Task Force tenüng nung Help Nagaland Breathe (HNB) Campaign-i district nem medical aids/consumables/medical equipment tenla agütsüba atema kanga pelaba lemsatepogo.

Osettsüttem ya Deputy Commissioner-i October 19 nü agizükba liasü.

Osettsüttem rongnung oxygen cylinder regulators 30, thermometers 70, pediatric oximeters 15, PPE Kits 800, pulse oximeters 100, IR temperature guns 40, 3 ply masks 4000, N95 masks 200, sterile & non-sterile gloves

1500, oxygen masks 50 densema lir. Iba den bendenloksema HNB Phase 2 distribution sentong kübok HNB Campaign-i Oxygen Cylinders (10 litres) 2, Oxygen Cylinders (46.5 litres) 10, pulse oximeters 50, NRB masks 50, hand sanitizers 400, medicine kits 600, BIPAP machines 2 aser PPE kits 300 District Hospital Mon, CHC Tobu aser CHC Aboi nem tenla agüja liasü.

Maneni Deputy Commissioner-i ashiba agi, medical aid/consumables/equipment tem ajanga Covid-19 den rara nung District nem teyari tulu agütsütsü aser iba atema HNB Campaign dang kanga pelar.

Ethiopia nung state of... (Tapak 8 nungi...)

US Special Envoy for the Horn of Africa Jeffrey Feltman-i Mongulbarnü sangdong ka nung TPLF tashi ulushia aoba aija liasü.

"Tigray alema oa TPLF temi maneni rara tuluba kumdaktsüba aija aru aser maneni TPLF dang Afar aser Amhara nungi ainshitsü akhanger," ta Feltman-i ashi.

"Ajisüaka rara tuluba akumtsü ya takzüteta liasü, kechiaser Tigray nung ayawara tenzüka tensa kanga mejungi kumaka Ethiopia sorkari June ita nungi tenzüka Tigray nung meimchir nem teyari balala agütsüba aser shishilempaba maparen shibangia liasü," ta pai ashi.

Ano US sorkaria Ethiopia nem agüja aliba shishilempatsü maongka meyiba agitsü, ta Mongulbarnü shia liasü, kong

Ethiopia nungi bener aruba osettsüset nung saru memeshiba dena lir. Ethiopia nung alimai meteta aliba meimchir temeden nung aibelenba ajanga iba mera ya agitsü, ta US sorkari ashi.

Iba yagi Ethiopia rongsenketzung nung takoksa tulu ajurutsü, kong rara ajanga osettsüset nung jenjang tali temloker lir aser COVID-19 tashidak wara agi kongshia lir.

Rara ajanga iba linük nung humanitarian crisis ajurua nisung meyirijang aika awayara ama tensa ajurua lir, ta United Nations ajanga ashir.

Iba rara nung nisung meyirijang aika tepsetogo aser ano million 2.5 dak tema pei ki yutsür tesem balala bushia jena aotsüsa akum.

Tottenham manager asütsü Antonio Conte shimogo

Yimpoksüi/November 3, 2021 (Agencies): Tottenham-i Mongolbarnü par team manager asütsü Antonio Conte shimogo. Ita tenet tsüingdang parnoki manager tasembuba shimogo.

Conte den 2022-23 season tatembang tashi tenangzüktepa ka yangluogo aser tenangzüktepa atsülangshitsü lenmang mesapoka yuogo. Nuno Espirito Santo mapa nungi anentsüba sülen anogo ka lir Conte shimogo.

Inter Milan den Serie A akokba sülen mapa toktsür May ita nungi Conte kecha club dena sendaka maliasü. Pai Chelsea coach mapa inyakba mapang season ana nung Premier League title ka aser FA Cup ka akokba sülen 2018 küm toktsü.

"Coach mapa tanaben inyaksü maongka anguba atema aser talisa, temaba jenjang tonga asayatsü tejangraba aliba Premier League club nung inyaksü maongka anguba atema kanga pelar," ta Conte-i ashi. "Tottenham Hotspur ket nung state-of-the-art facilities aser alima nung stadiums tajungtiba rongnung ka lir."

June ita Jose Mourinho-i mapa toktsüba mapang Tottenham coach mapa abentsü atema Conte den jembishinütep saka telemtetba ka magiteti liasü.

Ajisüaka managing director Fabio Paratici Tottenham-i aruba ajanga Conte anir arutetogo, kechiyong tena tesendaktep tajung lir aser Juventus nunga

külemi inyakogo.

Conte lenisüba nung Tottenham pur mezüingbuba asaya Europa Conference League nung Vitesse Arnhem den Brestostibarnü asayatsü aser Premier League nung Deobarnü Everton den asayatsü.

Nuno lenisüba nung Tottenham pur iba season kanga junga asaya tenzük. Pai aniba team-i mezüingbuba Premier League asaya asem akokba sülen August ita pa nem manager of the month naroküm agütsü.

Ajisüaka iba sülen Tottenham pur asaya tenet nungi pongu nung tamakok angu. West Ham aser Manchester United den asaya nung parnoki target nung goal ka danga memetsüoktsüti liasü.

Khel Ratna atema Manpreet bendenlokogo

Yimpoksüi/November 3, 2021 (Agencies): Olympic nung bronze medal anguba India hockey team captain Manpreet Singh-ia Mongolbarnü Major Dhyan Chand Khel Ratna awardees list nung züingoksemogo. Taküm iba naroküm atema asayar 12 shima lir. Naroküm agütsüba sentong ya November 13 nü Rashtrapati Bhavan nung agütsü.

Manpreet ya mezüingbo Arjuna award atema shim saka tang goalkeeper P R Sreejesh den iba tetushi atema hockey asayar tanabuba ama pa shimogo.

Khel Ratna tetushi atema züingoksema alirtem rongnung Olympic champion Neeraj Chopra aser Olympic silver-medallist wrestler Ravi Dahiya nung densema lir.

Arjuna award atema shima alir parnok 35 rongnungi timba Paralympic nung medal angurtem aser Cricket asayar Shikhar Dhawan aser Mithali Raj na densema lir.

Iba sentong ya taoba kümbo Covid-19 wara pokteter aliba ajanga online ajanga dang agia liasü. Küm pezü tsüingda asaya

balala nung tangar dang nungi alakteta tajungba asayartem nem Khel Ratna ya agütsür.

Olympic aser Paralympic nung India nung asayartemi kanga junga shilem agiba sülen taküm tetushi agizüiksupur aika asütsü imlaa liasü.

India nung asayartemi Olympics nung medal tenet angu aser Paralympics nung medal 19 ngua liasü.

Kasa mapang nung Dronacharya awards atema coach 10 shimogo.

Major Dhyan Chand Khel Ratna Award atema shimertem:

Neeraj Chopra (Athletics), Ravi Kumar (Wrestling), Lovlina Borgohain (Boxing), P.R Sreejesh (Hockey), Avani Lekhara (Para Shooting), Sumit Antil (Para Athletics), Pramod Bhagat (Para Badminton), Krishna Nagar (Para Badminton), Manish Narwal (Para Shooting), Mithali Raj (Cricket), Sunil Chhetri (Football), Manpreet Singh (Hockey).

Arjuna Award atema shimertem:

Arpinder Singh (Athletics), Simranjit Kaur (Boxing),

Shikhar Dhawan (Cricket), CA Bhavani Devi (Fencing), Monika (Hockey), Vandana Katariya (Hockey), Sandeep Narwal (Kabaddi), Himani Uttam Parab (Mallakhamb), Abhishek Verma (Shooting), Ankita Raina (Tennis), Deepak Punia (Wrestling), Dilpreet Singh (Hockey), Harman Preet Singh (Hockey), Rupinder Pal Singh (Hockey), Surender Kumar (Hockey), Amit Rohidas (Hockey), Birendra Lakra (Hockey), Sumit (Hockey), Nilakanta Sharma (Hockey), Hardik Singh (Hockey), Vivek Sagar Prasad (Hockey), Gurjant Singh (Hockey), Mandeep Singh (Hockey), Shamsher Singh (Hockey), Lalit Kumar Upadhyay (Hockey), Varun Kumar (Hockey), Simranjeet Singh (Hockey), Yogesh Kathuniya (Para Athletics), Nishad Kumar (Para Athletics), Praveen Kumar (Para Athletics), Suhash Yathiraj (Para Badminton) Singhraj Adhana (Para Shooting), Bhavina Patel (Para Table Tennis), Harvinder Singh (Para Archery) aser Sharad Kumar (Para Athletics).

BAMD-i basketball asaya ajungkettsü



Basketball Association Mokochung District ketdangsür aser züingsemtem November 2 nü Longkumer Kilem nung senden ka amenba sülen tangokba noksa nung angur. BAMD ya district nung basketball asaya ajungkettsü nükjidong nung 2020 küm basketball asayar aser asaya meimertemi tenzükba lir.

Mokokchung, Yimpoksüi/November 3 (TYO): Basketball Association Mokochung District (BAMD), koba 2020 küm tenteta liasü, iba telok yagi tang nungi tenzükter district nung basketball asaya ajungkettsü.

BAMD ya Mokokchung

district nung basketball asaya meimertem aser asayartemi tentetba lir, aser lokti nung lanurtem basketball asaya nung ajungkettsüji parnok nükjidong tongtibangitba lir.

Küm tem tsüingda shilem balala küma lemsar coaching camps aser asayamungtem

ayongzükä asayatsü parnok sentong lir. Mokokchung district nung basketball asaya meimertem ajak iba telok nung züingoksemtemtsü.

BAMD ya tir Meyatoshi Imchen aser General Secretary Tamsutoshi Longkumer na lenisüba nung inyaksangshidar.

NSF Trophy: Mhakenyi Kro-u final-i iogo



Kohima, Yimpoksüi/November 3 (TYO):

Angami Students' Union-i ayongzükba, 21buba NSF Martyrs Memorial Trophy mezüingbuba semifinal nung Mhakenyi Kro-u Football Club nungi asayar Asito Krose (7)-i hat-trick ka idakja par team final-i iogo. Iba asayamung ya Indira Gandhi Stadium, Kohima nung tang tasayadak lir.

Semifinal mezüingbuba asaya nung Mhakenyi Kro-u team-i goal 4-1 agi Berenike FC Meriema madak takok ngua liasü.

Asaya tenzükter minute 5buba nung Asito-i free kick ka ajanga Mhakenyi pur atema mezüingbuba goal idaktsü aser iba sülen minute 17buba nung penalty ka ajanga pai tanabuba

goal idaktsü.

Kasa mapang nung Berenike FC nungi asayar Longo-i minute 35buba nung par telok atema goal ka idakja goal 2-1 nung asaya mezüingbuba shilem tembang.

Asaya tanabuba shilem nung Mhakenyi Kro-u team-i goal idaktsütsü maongka anguba kar magitet, ajisüaka Yhunshalo Kemp-i (9) minute 81buba nung par team atema tasembuba goal idaktsü aser Asito-isa, minute 86buba nung free-kick ka ajanga goal pezübuba idakja parnoki asaya akok.

November 4 nü tanabuba semifinal asaya:

FIFA FC vs Headhunters @ 5:30 PM.

T20 rankings: India nung rongnungi Bumrah jenjang tajungba kümogogo

Dubai, Yimpoksüi/November 3 (Agencies): Bodhbarnü sayaba ICC men's T20 rankings nung India team nung asayar tejen Rohit Sharma batsmen tem rongnung jenjang ka tejakdangi tua 23buba nung lir aser bowler tem rongnung Jasprit Bumrah jenjang 10 tejakdangi tua jenjang 24buba tongtetogo.

Tang asayaa aliba T20 World Cup nung half-century ana atonga yangluba sülen Pakistan captain Babar Azam-i England nung asayar Dawid Malan ajateta batsmen tem rongnung No. 1 kümogogo.

Babar, shibai Afghanistan den run 51 aser Namibia den run 70 yanglua liasü, pa tang agi trokbenbuba temaba jenjangi tuogo. Arishi küm 27 tain asayar-i iba jenjang ya 2018 küm January 28 nü mezüingbuba ajangzüktepa liasü. Pa tang ODI batsmen tem rongnunga temaba jenjang nung lir.

Babar-i rating point 834 anguba sülen pa Malan dang nungi point 36 agi timba kümogogo. Malan ya taoba küm November ita 29 nü nungi temaba jenjang nung liasü.

WC nung England team-i

kanga junga asayaba sülen opener Jos Buttler aser Jason Roy naprongla tejakdangi tuogo.

Buttler jenjang ti tejakdangi tua tekububa aser Roy jenjang pongu tejakdangi tua 14buba nung lir. Buttler-i Sri Lanka den asayaba mapang tang mezüingbuba T20I nung century yanglua liasü.

Kasa mapang nung Sri Lanka nung leg-spinner Wanindu Hasaranga, tang mezüingbuba bowler tem rongnung temaba jenjangi tuogo. Pai South Africa aser England den asayaba mapang wicket asemsem agiba sülen iba jenjang ajangzüktepa. Pai South Africa nung bowler Tabraiz Shamsi ajateta liasü, shiba taküm April 10 nü nungi temaba jenjang nung liasü.

Bowler tem indang ranking nung temaba pezü ya spinner dang lir. England nung asayar Adil Rashid-i Afghanistan nung asayar Rashid Khan ajateta jenjang asembuba nung lir.

All-rounder tem rongnung Mohammad Nabi-i rating points 271 ngua Shakib Al Hasan ajatetogo. Iba list nung Hasaranga jenjang pezübuba nung lir.

BILEMDANGANG

"Shisabulu khuret teti atema masü, yamaji tepela nung dang tetia malir."